

晚

晴

移

詩

匯

晚晴簃詩匯卷一百五十一

徐世昌

羅澤南字仲嶽號羅山湘鄉人咸豐辛亥舉孝廉方正

厯官浙江甯紹台道加布政使銜諡忠節

詩話忠節起儒生治團練毅然以滅寇爲己任轉戰而前寇爲披靡咸豐丙辰攻武昌中礮越數日而卒卒時索紙筆仰臥書曰亂極時站得定纔是有用之學臨絕握胡文忠手曰死何恨恨事未了君與迪庵好文正表其墓推爲豪傑

羅山吟

家住羅山第幾曲碧水繞門清可掬南窗捉絮倚垂楊北岸跳珠挂飛瀑渴來烹茶自汲水游魚上下紛相逐垂鉤終日不得魚高歌一曲湘水綠

家住羅山第幾曲幾株叢桂幾竿竹青帘競沽游客酒碧

田多種鄰翁粟日暮鄰家糴新米拾得生柴煮淡粥炊煙未熟客忽來挑鐙共展奇書讀

家住羅山第幾曲百年松枝大如轂老鶴歸巢卽友朋連林積雪皆珠玉小爐無炭冷風侵好是西窗對紅旭新詩裁成無人和落落梅花香滿屋

家居

不到奇窮總不奇田園驚盡忍長飢家貧幸免官催稅事少惟來友索詩日出尙眠宵坐久客來待借午炊遲窮途莫道生涯盡儘有文章作酒貲

弔蔡江門先生

今古興亡感慨同時窮世亂見孤忠曾聞夢繞熊湘閣公泣潭州我泣公

宋李芾殉難熊湘閣人稱爲李潭州先生至長沙時夢李公接之因哭奠於其廟

補裘痛懷先祖

冷雪凝階二月初  
羊裘補得勝華裾  
風霜記否當年苦  
典盡春袍送讀書

乙巳客長沙清明感懷

兩年旅邸過清明  
佳節重逢倍愴情  
麥飯遙憐諸弟薦  
松醪獨少一人傾  
高堂白髮貧中老  
游子青春客裏更  
嶽麓峯頭雲幕幕  
不堪重聽鷓鴣聲

喜雨

茅檐一夜雨  
農家百萬粟  
清晨荷鋤出  
長歌綠水曲

題寒梅圖

冉冉寒香渡水涯  
溪南溪北影橫斜  
含情最耐風霜苦  
不作人間第二花

清和既望月下偕諸生夜坐

浩月凌空照綠波  
廣寒宮裏舞嫦娥  
憑誰掃卻蟾蜍影  
天下清光應更多

古劍

仗劍天下游  
延津不可渡  
不平事尙多  
莫便化龍去

登章江門城樓呈江岷樵廉訪

突兀高城接上台  
千重雉堞倚江開  
浙閩山向雲中繞  
章貢水從天際來  
相見適逢多難日  
持危全仗濟時才  
興懷往昔情多少  
聊坐高樓共舉杯

小龍駒

有馬較諸馬獨小臨陣奮迅過之疾徐進退無不如意呼爲小龍駒

兵家勝負決須臾  
幾度疆場得意驅  
莫訝將軍天上到  
出羣應識小龍駒

去秋平安福時有天上將軍之語

讀兵書

至仁原無敵湯武兵書祖惟使三軍心共知萬姓苦飛揚  
猛士風凜凜王師雨逆命有苗民兩階舞干羽

和曾滌生侍郎會合詩

人生如荷露聚散無常期剗當爭戰後死生不可知寇盜  
起粵管蚩尤揚天旗承平二百載文武爭恬嬉以此長驅  
入天下喧鼓鼙江漢吼鼉鼉金陵窟狐狸誰敢攫其鋒卯  
翼我黔黎天子詔令下侍郎起南維水師駛鳧鶴陸師飛  
熊羆舊交入帷幕經濟酬所知老筠與腐公朝夕參軍機  
軍旅我未學末座聊追隨憶昔癸丑夏妖氛逼江西老筠  
偕我出往助岷公威賊聞膽已落一戰旋解圍筠車漢水  
回我馬吉水歸共知才不逮誓各隱衡疑侍郎何慙慙葑

非不我遺更得塔將軍拔之由偏裨忠勇冠三軍士氣隨  
轉移甲寅六月初旌旗下湘磯洞庭倒巨浪大江燃靈犀  
巖巖半壁山滔滔富池湄長江沈鐵鎖荆楚復藩籬射蛟  
潯陽江王師欲東之胡爲江水沸長鬣鼓鯨鯢封姨吐鬼  
火堅城頓雄師物論遂紛紛尤吹腐公疵成敗以論人西  
施亦可媼蘄黃何迢迢鎖鑰者阿誰賊旌復西指鄂渚填  
積尸東道廣與饒浙閩路欽讎賊又搗其虛多方令我疲  
侍郎曰否否禍者福之基丈夫誓許國艱險復何辭旌節  
駐匡廬樓船修彭蠡塔公擬西征我兵靖東陲堂堂數路  
出不自惜奔馳調度雖有方未免傷睽違老筠知其故翻  
然出書幃欲紆侍郎憂用慰腐公思我方戰信水不得晤  
鬚眉斯人旣未死世事尙可爲嗟哉賊勢猖六年已於茲

長江幾千里嗷嗷鴻雁飛吳人或越奔南人復北棲父子不相見妻孥長別離何時清寰宇大旱慰雲霓普天兒女子共作會合詩

彭玉麐字雪琴衡陽人諸生官至兵部尙書一等輕車都尉加太子少保贈太子太保諡剛直有吟香館退省盦等詩草

俞蔭甫曰公幼嫻詞翰每爲詩搖筆立成嘗同游雲棲公左手執杯右手把筆卽席成詩六章余詩所云籃輿有約到雲棲白髮彭郎興不傾左手持杯右手持筆六章詩在席間題紀其事也少年詩頗效法西崑對屬工麗體格沈雄晚年間有流於率易者多成於談笑之頃故歌行不多作然如泊甘棠湖看五老峯一首硬語盤空可與昌黎爭席貞女行敘次詳贍音節古雅則又與孔雀東南飛相伯仲非致力於詩者深能若是乎

詩話剛直佐曾文正治軍始期水師戡定功最多事平巡閱長江上流起湘鄂下游連蘇杭戎旂所莅兼



察庶政諮民聞疾苦黜墨吏刈莠氓威棱甚肅詩特其餘事而渾浩流轉勁氣直達亦可想見其爲人尤好畫梅老幹繁花意爲揮灑所至湖山勝處輒留詩畫則羊公峴首意也

感事

薄宦嚴君二十年皖江淝水汲清泉空遺舊產三間屋難

起新炊一竈煙慈母箱存衣上綫他人囊飽俸餘錢嚴君

爲人乾沒烏衣巷口斜陽冷安得王孫癡叔賢

送別楊弼卿茂才湘人寄居於楚生平任俠毀家末年潦倒無有顧之者

陽關唱罷暮鴉飛萬里江天夕照微雙槳劃開湘水綠嶽

雲滿載一船歸

廣西全州道上

綠楊隄岸夕陽斜半角青帘露酒家滿地紫雲吹不散野

田蠶豆亂開花

客中感懷

輪蹄鐵盡爲謀生文字因緣結未成白髮頻添游子淚黃  
金深感故人情難從糠市還詩債欲破愁城借酒兵花事  
亦如人事苦十天春未一天晴

謁余忠宣公墓

英風凜冽赤心存皖伯臺前廟貌尊七載孤城餘戰血千  
秋祀典慰忠魂寒森墓道松楸老聲咽江流草木昏請向  
大觀亭畔看一池清潔水常溫

墓鄰大觀亭有盡  
忠池嚴寒不陳

黃河北渡漫興

赤滾神河浪黃飛大漠沙月昏嘯怪鳥風急亂寒鴉野店  
蘆爲屋荒村水當茶一鐙青旅館有客夢還家

牙屯堡軍夜

埃火橫燒烈燄紅敵人四面路皆通心驚刁斗連宵擊腰  
繫椰瓢屢日空軍中悉以椰瓢爲飲食具維時糧草路絕無從得米野竈煙炊苗婦  
筍營門月冷武侯松夜深巡視三軍睡頭枕征鞍手挽弓

克復岳州

城隅高聳岳陽樓電掃雷轟濁霧收滿地赤巾拋髑髏一  
天紅日耀兜鍪自慚雞肋非猿臂予右肘中賊礮幸骨未斷已見龍泉  
斷虎頭塔智亭軍門斬賊魁曾天養稱虎頭軍終夜枕戈聽刁斗哀鴻聲裏  
不勝愁

肅清洞庭湖

岳陽樓外草萋迷戰艦橫飛耀彩霓犀甲雄吞雲夢北鴉  
軍勁掃洞庭西重湖八百潛蛟蜃孽浪三千靖魴鯢遙見  
君山青一點湘妃廟冷杜鵑啼

次麻竹師孝廉見贈原韻卽以書感

無復軍中喚史都空留餘恨失吞吳只緣豎子無長策不

是彭郎誤小姑

子部下都司史久立有謀勇善戰人悉以史都爺呼之十二月十二夜戰歿初由九

江扼湖口也探小姑山彭澤賊有船二百餘通糧予擬乘夜陳輕船往襲可一炬而盡使湖口城賊無糧亦易破商

之諸軍皆不大燾高牙看遠引奔狼突豕任長驅唾壺擊

碎尋常事

一日愁澆酒百壺

賊上下夾攻諸軍復不禦而

退子船悉入湖爲賊斷後路不能出賊分兩岸直奔江鄂

子援江保全省城無恙鄂帥楊制軍擁重兵駐黃梅聞賊至卽率兵連夜退走不守

武漢任賊長驅武漢復失

攻克彭澤奪回小姑山要隘

賊以江心小姑山爲礮臺於東岸彭郎磯西岸

小姑狀築兩僞城環巨礮以阻我水師戰兩日破之戲題二十八字於崖壁

書生笑率戰船來江上旌旗耀日開十萬貔貅齊奏凱彭

郎奪得小姑回

肅清江西全省

江西府廳州縣共失守六十餘處只存省垣一片乾淨土江岷樵力也

年來浩劫滿洪都郡縣收回六十餘狐兔妖氛消蠹水鯨  
鯢孽浪靜鄱湖桃花嶺舊飛紅雨桑落洲新長綠蕪惟有  
疲民蘇未易不堪庚癸歲頻呼

賊平後喜少皋胞弟歸來

弟以道光末以筆硯餬口於河北旋亂離兵火間阻

不通音問者二十年原草青青鶻鵲寥落傷懷何限克復金陵大兵北渡收拾餘氛南北道通弟始由西安歸來相晤不相識悲喜交并矣

雁序分飛二十年中間蹤跡兩茫然池塘春草添新夢伯  
仲壘篋續舊緣秦嶺路因烽火隔秣陵月爲弟兄圓鵲鴿  
往事傷回首話到酸辛淚自漣

都門曉發

迢露上征鞍雞聲唱未殘新詩吟短句舊夢醒長安馬鐸

鳴霜冷車宿透月寒早朝風景在回首五雲端

游蘭亭有感

舊日蘭亭不可尋頻教勝會憶山陰空留一紙昭陵帖孰  
嗣千秋典午音殤短彭長今昔感風流雲散盛衰心我來  
舅氏皆零落憑弔荒煙淚滿襟予舅氏爲逸少後裔兵燹  
斯亭徒增感慨耳後無從問渭陽消息來游

泊甘棠湖雨後看廬山五老峯

匡廬峯何蔥蘢五老秀削青芙蓉欹崙崩凌長空雁行  
排列舒笑容蚪藤蝓木如扶筇蒼顏綠髮苔蒙茸遠看偃  
僂復龍鍾近看挺拔秀且雄我家南嶽依祝融曾登泰岱  
與華嵩不見湖光萬頃擴其胸不見洪濤巨浸當其衝此  
峯不獨飛泉鳴琴聲淙淙更有汪洋灝瀚鄱陽湖水飛銀

龍聞說上有千年桃花紅幾欲凌空飛到天池最上重大  
呼匡廬處士同去尋仙蹤振衣千仞長嘯開羣聾

貞女行

清泉馬智泉太守次女七姑自幼知詩書明  
大義賢淑異常女其姑嫁衡陽馬潔卿觀察  
諸弟松軒司馬因親姻遂字其姑之子煥孝少  
劇姑夫婦旋歿煥孝長而甯馨文采風流翩翩佳  
公子也服闋年二十一女年十九婚有日矣煥孝  
忽以療卒女聞欲身殉賴父母嫻戚防勸再四許  
以髮髻麻衣歸馮奔喪守貞始得不死易服往弔  
奉主再拜慟幾絕送者塞途不期而會幾千人淚  
悉下女隨殯視窀穸盡哀盡禮嗟嗟可悲亦可敬  
矣予退居養病於後進喪不往弔可也然事關風  
化不往賀則不可因偕三學校官暨同人往賀賀  
而拜拜而不容已於言故作貞女行愧不文不足  
表揚貞女之志聊引其  
端以待彤管有煒者

衡山深而幽湘水淨而綠山幽何足奇水淨何足錄此中  
毓秀靈女貞森樸棧馬馮舊朱陳兒女新如玉絲羅結絲  
羅朱繩牢繫足親友偕歡欣共道姻緣夙公子佳翩翩文

采光離陸鸞交已定期無何乖鳳卜二豎忽爲災阿耶疾  
危蹙修文赴玉樓紅絲命難續噩耗來女家父母各瞠目  
女已測知之趨向膝前伏哽咽低致詞女自知薄福雙親  
爲女心百身莫能贖曾讀柏舟篇毋使歌黃鵠前聞郎病  
沈女已思之熟許女歸始平百苦甘熒獨否則不求生但  
求命絕速闔家苦難言悲傷慘骨肉父信女心堅母知女  
志篤唯唯各相膺女起身反屋脫卻錦繡襦登輿去慙促  
血淚入馮門卽易斬衰服父母偕弟昆奔送多姻族慘目  
最傷心捧主拜花燭觀者千百人同聲齊一哭嗟嗟彼美  
姝至情自有屬誰說古共姜今世睹難復誰說勁草無扶  
風有貞木志同金石堅從繩不能曲心同冰雪清飛塵不  
能黷鬼神爲之欣天地爲之肅馮郎木主成往拜我齋宿



名教古今尊理難語流俗不弔而往賀庶幾有感觸廣文  
諸先生名篇燦綺縠黃堂太守賢彤管揚清馥御史大中  
丞緣情申奏牘飛騎達天庭褒嘉無愧惡綸綍頒煌煌綽  
楔豎矗矗百年雖苦心千秋留芳躅堅貞自不磨勁節誰  
與角青青衡山松猗猗湘水竹

宗室恩華字緘庵鄭慎親王烏爾恭額子考封輔國將  
軍官理藩院尙書有求真是齋詩草

白河

飲馬河流沒馬蹏輕風吹浪聽淅淅龍沙古渡餘烽火鱗  
瓦前村忘鼓鼙落日尙疑旗影動逝波猶帶角聲淒昔時  
戰壘今何在叱犢春疇雨一犁

堂梁

籟寂天空漏已沈一聲清唱警塵心林原響振孫公嘯月  
夜情酣漁父吟咳下似傳驅楚策雍門猶見繞梁音宵嚴  
舊載金吾令聽到更殘韻轉森

舒燾字伯魯激浦人官戶部郎中有綠猗軒詩鈔

詩話伯魯初爲梅伯言弟子盡焚舊所作詩集中多  
悲傷潦倒之作曾文正嘗謂伯言曰伯魯奇才也然  
好作悲語不稱其年恐  
非福果未三十而卒

舟中早起

客路難爲寐推窗促放船鐘聲敲短夢鷹影破寒煙殘月  
忽在水餘星尙滿天重裘霜氣重坐對燭花妍

渡黃宿徐州隄上

青山無數爭來前黃河春水流涓涓三年燕趙飽塵土眼  
明喜見江南天高樓倚空殊峯嶸蘇子風流渾如昨滔滔

濁水來崑崙千古何人見消落層城華屋十萬家春來飛  
徧桃李花通衢南北集行旅夕陽煙火紛周遮長隄去水  
不盈丈峩峩倒壓重城上可憐性命輕蜉蝣忍使兒童狎  
波浪朝廷恩大多靈威歲發帑藏防隄圍黃金百萬亦虛  
擲居民苦瘠蛟龍肥間關一夕河隄宿隔岸疏鐙出茅屋  
夜半風聲若海潮頓使危心生遠目君不見桃源口決十  
丈餘萬姓飄蕩都爲魚儒生歎息空道路歸來還讀河渠  
書

潘曾瑋字季玉一字玉沚吳縣人蔭生歷官刑部郎中

記名道有自鏡齋詩鈔

符南樵曰季玉爲文恭公幼子精倚聲論詞詩云意  
內而言外妙在此興先與周介存先生所言有合詩  
不多作直  
追唐人

送汪小珊歸省

郁郁青棠花亭亭連理枝青棠可蠲忿連理紛葳蕤與子  
爲益友形影兩不疑但願長相見安知有別離別離欲何  
之江南我所思人生各有職恨不相追隨惜此良會促感  
彼心知希道路隔千里會面未有期常恐會面日已非少  
年時

少年不可恃千載何悠悠曜靈常西馳逝川但東流陽春  
方驗盪倏焉淩素秋人生在一世譬若江上鷗亮無松喬  
壽不死非可求達者垂大觀卒歲且優游憂傷以終老無  
乃拙身謀永言難盡意別淚忍復收行矣各自愛相期勵  
前修

重九同人集顧祠秋祭並爲朱伯韓侍御祖餞卽席

分韻得制字

一雨鳳城秋西山明曉霽蕭晨入古寺賓從盛車騎佳節  
沉重陽崇祠肅時祭命傳多俊英唱妍更酬麗京師冠蓋  
場歡會歲復歲豈無金石交亦有芝蘭契所期盟歲寒各  
具傲霜意遭遇在一時得失千古事我愛朱御史盤盤有  
經濟朝陽曾一鳴蘇廣陳頌南快聯袂兩子去不來君留振  
土氣燭石待補天張輪勿埋地胡爲將母呼秋風速鼓枻  
獨鶴向南飛來雁望北至安知澗槃游不爲廊廟計送君  
飲君酒四座勗古誼我亟悵離羣狂歌雜清涕醉眼窄乾  
坤酒力不能制明日對黃花相思渺天際

嘲鶴篇呈少荃中丞

白鶴海上來毛羽自珍惜豈爲飲啄謀下爭雞鶩食遠勢

待盤空奮飛終有力一旦拘樊籠難振九霄翮主人眷顧  
深珍重異凡禽安羨乘軒貴羞爲鍛羽吟鍛羽爾勿悲一  
舉自千里所望附青雲聲聞從此始我爲嘲鶴歌嗟爾久  
寂寞嘲鶴且自嘲我亦不舞鶴

疊許鶴巢韻

故園西望尙烽煙諸將爭先猛著鞭端賴汾陽回紇馬何  
如王濬益州船疾風待掃經霜籜浩劫誰生出火蓮盼到  
甘泉真報捷先看旗鼓井陘前

光聰誠字存之桐城人諸生官太常寺丞有閒齋詩集

詩話存之名家子久躋場屋其仲兄律原方伯謝病  
歸白頭兄弟逍遙山水間以爲人世至樂迨東南寇  
擾存之方爲鄉里團練倉皇奔徙顛頓流宕數年以  
卒詩分前後兩編後編皆避亂時所爲境迫而詩益  
富其子吉甫以成豐己未  
成進士乃輯遺詩付梓

游石橋巖並內巖

白岳闢西戶石磴幾盤紆山窮敞繡塍緣隰陟崎嶇丹巖  
突兀聳赤城霞不如太古餘溜痕赭黑交相於壁有青龍  
蟄倒挂頷垂珠神彩宛飛動苔蘚繞其軀山勢忽幻形長  
橋跨清虛廣度三百弓高建五丈旗中搖一峯影窈窕似  
名姝青青千琅玕暮倚容更殊搜奇越長橋內巖何沮洳  
巖端灑霜雪炎夏涼衣裾在昔甘泉子闢堂此讀書堂圯  
易荒剝剝更傾頽餘人事有興廢林壑無終初我來樂斯  
邱箴言謝衛蘧

讀左穗六詩卷

往者漁洋老論詩重太沖君家自有法吾道本從同妙悟  
憑天授虛懷若谷通傾心一開卷如撫廣陵桐

三元洞

翠螺山洞問三元石磴逶迤直到門小閣簾開通碧漢長  
江帆過落金尊懸崖有力憑雲構攬勝無心駭浪翻我是  
蓬萊遺佚客不妨駐此悟真源

擬尋鄧尉梅花不果回舟次鎮江

江頭買棹趁春回萬樹空嗟鄧尉梅未到銅坑看綽約且  
憑鐵甕一徘徊鶴銘沙跡終難辨羊石雄風尙可猜鷗鳥  
容吾親浩蕩不妨盛世老樗材

余以去歲仲冬來莊幾周歲矣近以足疾閱月未曾  
出戶昨於荆扉外見丹柏一株感時序之遞嬗歎  
盜賊之紛紜聊作長歌以誌憤激

昔我倉皇來避寇木葉已脫山容瘦元鳥罷飛白駒馳丹



相一株又錦繡我心疾疾足更蹇照眼秋光淚盈袖附郭  
萬株化爲烽幾樹含霜弄清晝南風雖競功未收北關宵  
衣佇凱奏棲遑半菽求一飽逼索追逋遭詈詬自古賢聖  
多困窮莫羨兒童善奔走城邑縱使穴兔狐郊原尙可安  
去就況聞大軍及義民同伸憤勇若私鬪嗟君勿作守株  
人掀髯一笑胡不胄

宗室岐元字子惠禮烈親王代善十世孫由筆帖式官  
至成都將軍

詩話子惠起自宗璜陟歷卿寺秉節陪京移鎮成都  
凡十年卒官公廨舊有園曰澄懷子惠取太白詩錦  
城雖云樂不如早還家意榜曰雖園日與僚友賦詩  
其中劉文莊督西川秀水朱詠裳善祥爲學使邛州  
伍崧申肇齡爲掌教皆相酬唱是時宇內猶  
無事軍書旣簡優游多暇其風度亦足多矣  
和顧幼耕復初秋懷

無感何驚秋入定不知暑大樸慕義農矯隘薄巢許利劍  
漫逐蠅頑石天可補溱涉挑狂童洛游動交甫重不自引  
嫌辱與人何與老經失離奇屈騷太嬌嫵天地任斡旋物  
我何取予生生無盡期造化不吾阻

和伍崧申

肇巖

江樓

時雨時晴畫本開風光不厭酒徒來岳陽樓上梅花笛習  
子池邊鸚鵡杯聲重晚鐘聞遠寺夜深涼雨長新苔臨江  
好看東來客移取芭蕉別院栽

沈壽榕字朗山號意文海甯人歷官廣東布政使有玉  
笙樓詩錄

九日登白帝城望八陣圖題武侯廟

落日高城隱暮笳客心孤迴正思家傳書待寄雲中雁讀

史羞論井底蛙在昔君臣似魚水而今窟穴有龍蛇羣材競起終何事且倒芳尊就菊花

塔忠武義馬歌

靜臣中丞爲榕言前湖南提督塔公齊布驍勇善戰剿賊於湘潭得一馬

色微赤身短脊立而尾特長腹下旋毛若鱗甲狀聞鼓聲輒奮起一日追賊入窮谷馬不進異而跡之則下臨深淵旁有伏焉隨馬奔處得小舟乃渡方突圍時受刀傷不厥後公歿於九江伏櫪悲嘶俯首垂淚人呼爲義馬云

塔公上馬能殺賊此馬偏從賊中得百戰沙場破竹功滿身雲錦桃花色汗溝隆起垂梢長黃金羈勒青絲韁旋文在腹似鱗甲人驚天驥非尋常當時追賊搜窮谷陣壓元雲白日速馬行不行若有知賊來不來疑有伏俄臨千尺流水深無盡頭叢薄殺聲起欲渡無行舟舟來公且渡更恐前無路重圍躍出鳥飛難毛血淋漓馬行處將軍歸來

衣上紫不克九江臣憤死便爲厲鬼亦忠魂遙望長安謝  
天子素旌飄搖依靈輶哀嘶櫪下聲酸悲壯哉忠武自不  
朽惜哉義馬無人知劉公告我我作歌座中有客雙滂沱  
長沙彭參將定泰爲  
公舊部言之泣下千秋國士千金骨知己不逢空奈何

何時

何時滄海變桑田劃破鴻濛界外天諸國有疆分島嶼漢  
家無事習樓船煙開鼇背憑空結燭照犀光徹夜然世上  
升沈都莫問君平賣卜已年年

凡骨求仙亦妄哉豈知方丈與蓬萊童男艸女終何有芝  
草桃花未易栽擊節馮夷驚水立乘槎博望踏空來奇文  
莫羨元虛賦未必能傾萬古才

二十年中電火流追思舊恨迸新愁才多早發盈庭議計

拙終成築室謀大將立功防內外賢人責備有春秋四牽  
五餌尋常事賈誼緣何哭便休

入手新書共賞奇飛騰光怪氣淋漓乾坤可納形諸掌福  
命難言相在皮牛鬼有靈紛變態馬衙無用肖兒嬉不知  
野史亭何處載記他年絕可疑

恩錫字竹樵滿洲旗人歷官江蘇布政使署漕運總督  
有承恩堂詩集

季秋偕雪堂同同人重游卧佛寺

招提佳境足清游曳屐重登最上頭百道泉聲喧客座四  
圍山色入僧樓白雲如絮不成雨黃葉滿林都是秋笑語  
諸君慢歸去禪房花木好探幽

感事

積雨連朝水倒流鄉關迢遞思悠悠斜陽漸下丹楓晚戰  
骨空埋碧草秋惟有謝元能辦賊斷無王粲不登樓風塵  
鞅掌何時已夜草軍書祇自愁

卽事

恩恩節序問誰知又值紅榴吐豔時客裏看花難覓酒鐙  
前聽雨易成詩三江憑弔風雲慘四野荒涼鳥雀悲欲挽  
狂瀾猶未得十年淮上老偏師

張岳齡字南瞻號子衡平江人諸生歷官福建按察使  
有鐵瓶詩鈔

詩話南瞻以諸生從戎游躋監司遽以病免人咸惜  
之晚年編歷名山所至有詩多可存之作曾文正謂  
其五律近孟襄陽七律未  
得古人門徑調較凡近

留別洪瓊輝

豈不惜儔侶青山招我歸論文虛竹屋避暑淨荷衣古道  
幾人共知音今日稀思君當後夜落月有餘輝

答楊莘耕

志伊

大令

投筆竟何事枕戈徒爾爲病多成我懶才薄畏人知峭石  
有奇氣寒花無媚姿祇應返林谷飲酒和陶詩

秋夜感懷同鍾西耘

德祚

孝廉

涼颺入庭樹瑟瑟動秋心華髮隨年改孤鐙與夜深露香  
清晚菊煙暝促歸禽不盡雙江水憑君獨賞音

少林寺

少室矗空起幽藏祇樹林傳衣一席地面壁九年心我欲  
參方丈微言不可尋茅庵棲隱處南望白雲深

李昭慶字幼荃合肥人歷官記名鹽運使贈太常寺卿

過無爲州晤劉仲良潘琴軒兩方伯周沐三大令別

後卻寄

經生天祿有光輝骨相誰令食肉飛  
鄴下文章空幾輩順昌旗幟震餘威  
桃花漫問元都觀芍藥爭開金帶圍  
早晚除書下丹陛那從賢達遂初衣

騎省閒居鶴唳悲北堂餘慕廢裁詩  
瀧岡阡表歐陽子家

廟碑銘郭敬之

琴軒假歸爲贈公營葬建祠旋奉母太夫人諱

出處能全忠孝志

遭逢何幸聖明時西陲經略資韓范會起平泉擁節麾

公瑾論交兩世深每從人海憶浮沈

沐三師事先光祿公於京邸

利名

恬淡關天性言笑矜持見道心甘託成都潛賣藥懶同彭

澤試鳴琴十年冷抱梅花卧合證前身處士林

片帆西上皖公城臘鼓頻催歲序更殘雪望中巖岫近野



鷗眠處岸沙平幾家茅屋搖鐙影一夜風濤撼枕聲歸夢不隨詩句穩已聽喔喔雞鳴

黃振河字海樓大興人舉人由知縣歷官河南候補道有勵齋詩草

詩話海樓觀察僑居衛輝先大父與相識光緒初曾攝開歸道篆余兄弟昔試游梁書院頗受識拔遺詩數百篇未有刻本最錄及之不勝今昔人琴之感

琴臺懷古

欲訪唐賢蹟城西萬綠曛四圍山抱郭一帶樹霑雲臺影自終古琴聲久不聞青條何處是惆悵次山墳

距臺十里許

元道州墓在青條嶺

爲托見亭都闕題趙子昂畫馬

伯樂一過馬羣空相馬獨識馬中龍形影胡來入圖畫高

堂素壁生長風英姿颯颯生氣充百戰能助功人功豈當  
求之凡馬中曹將軍沒韓幹死寫生誰如趙氏子近人畫  
馬畫皮毛趙公畫馬入神髓青絲絡千里駒世無王良與  
造父誰堪爲爾範馳驅海內方今戎事亟羽書絡繹無虛  
日往來奔命盡駑駘我撫此圖長太息君盍持此向燕臺  
千金入市非凡材蠶叢道路驂騑開吁嗟乎風雲際遇士  
所喜渥洼沙苑來千里誰爲郭隗君其始

秋陰

炊煙不辨晝沈沈涼雨通宵作曉陰極浦楓林添畫意閒  
庭梧葉墮秋心斜風斷雁模糊影中酒懷人慘淡吟山色  
如妝本明淨一經濃抹易蕭森

雨後登白雲閣春望

白雲閣上白雲飛野煙漠漠含四圍東風吹落天街雨千  
樹萬樹胭脂肥郊原潑水春光膩十丈梯雲蹋空翠斜陽  
晴曬榜人帆泥痕紅染沽春屐詩情畫意滿山城村村布  
穀相和鳴淇上健兒驅犢出東阡西陌催春耕春耕一犁  
滋霰霖乘興游春興未足歸來魂夢有餘清明朝澣滌衣  
襟綠

郭崙燾字志城湘陰人諸生官貴州候補道有蘿華山  
館詩存

南泉寺雜感

尋幽來古寺地僻心亦閒高僧容我居山在戶牖間古楓  
映蔥蘢好鳥時往還開軒延朝爽世慮從之刪讀書及宵  
深月出翠微灣對此發長嘯十年混榛菅

鑒堂書來問事口占答之

隱几維摩鬢已華  
雄心那復袖青蛇  
江湖談笑吾甘老  
不見烽煙哭萬家

周星詒字季貺號羆翁祥符籍山陰人歷官建甯知府有羆櫝詩質

孫仲容曰季貺先生學問淹洽喜藏書著錄數萬卷多宋元舊槧及乾嘉諸老精校善本自理董丹黃雜選抱經蕘圖未能專美詩詞多造微之作晚年刪定五言律詩五十餘篇高渺之致寓諸平易嶽奇之懷返之冲淡杼山長老有云清景當中天地秋色可與論先生之詩矣譚仲修曰樸屬微至於古人近元次山今人則莫子偁同歲炳燭頗愧洗華落實也木落天宇空心與俱曠異苔同岑百年旦暮

辛卯四月初五日夜坐時苦雨騎月

西風連日急夜冷過春三淦淦雲陰合冥冥雨色酣水深  
將爛麥暝至或蘇蠶衣食關民命天應慰不堪

枕上聞磬

一磬泠然脆悠悠度竹關道心澄夜靜餘響濛風間合眼  
見皇古置身如萬山五更窗欲曙夢警枕屏閒

春夜

不睡百憂集春深此草堂山風時啟戶江月直窺牀轉燭  
窮花態絨茶養露香幸多閒事業消得夜茫茫

題畫

重重千百樹策杖自裴裊萬綠破深甕孤雲兀廢臺風吹  
雁毛落秋引酒悲來無限茫茫意誰同醉此杯

秋感

慣覺衰翁夢戈船鼓四更連陰星月晦長夜鼠狐橫醉蟻  
奴羣睡憂嗟老獨醒一聲天下旦破暝祝雞鳴

秋殘天漠漠阪曠日蕭蕭翅仄鷹盤穩  
標新馬獵驍野風吹短髮村酒醉長橋  
共飲無相識騷魂嗒大招

陳元祿字抱潛號小鐵錢塘人官直隸  
永定河同知有十二種蘭亭精舍集

寄周澹巖幽居

徑仄少人過蕭蕭生薜蘿青山當戶遠  
黃葉閉門多阮籍惟宜酒陶潛許放歌  
科頭倚秋樹幽夢正婆娑

管繩萊字孝逸武進人官含山知縣有  
萬綠草堂詩集小樓晚望

江城坐老綠苔磯郭外青山望處微  
落日昏鴉爭樹急西風黃葉向人飛  
半天秋遠敲吟帽九月霜寒賦授衣  
獨有高樓延草色幾家臨水掩柴扉

晚步

出門看斜陽忽已上高樹攜手同心歡城隅散輕步秋風  
一夕來衣袂改輕素木葉脫何遲芳草色非故悠悠遠水  
明靄靄蒼煙暮牧晚笛歸村漁寒鐙隱渡登高暢幽懷感  
逝感內顧新歡不在眼陳人復誰慕存悲思浩歌念別感  
征路遼天廓無邊惟有寒鴉去

于養源字小堂儀徵人安徽補用知縣殉難予雲騎尉  
世職有都梁草

春寒

想到尋春意轉慵梅花落盡杏花紅呼僮鉤起重簾望不  
是東風是北風

送郭相廷先生還車橋

天涯蹤跡等浮鷗聚散無端我欲愁此去江南秋色好一村黃葉認歸舟

謝蘭生字厚菴武進人浙江候補知縣有詠梅軒橐

詠史

我生三十年曾讀漢魏史我讀漢魏史仰止習鑿齒謂魏爲正統蜀乃以寇視茫茫數百載誰復能議此賴公發聾聵大聲震里耳獨帝漢昭烈分別冠與履天道以不喪人心以不死煌煌良史才下啟紫陽子

題三閭大夫離騷後

瓦釜旣用事黃鐘故應棄眾醉乃獨醒尤爲同列忌主聽復不聰孤臣數益窮疏後旋見謫誰能鑒其衷卜居以明心離騷以寄慨終與汨羅沈樸忠何由遂至今沅湘間悲



風繞荒寺

方士鼎字羹梅一字庚眉號調臣定遠人貢生官東流

教諭有四持軒詩鈔

詩話調臣爲蓮舫太守之弟久困場屋以廣文終詩  
喜三李晚學香山放翁亦究心於蘇書法松雪小楷  
尤工絕寸縑尺楮人皆寶之包慎  
伯見其書咋舌曰吾望而生畏也

江干卽事

匹練澄清送早潮白雲深處斷虹橋荻洲風起秋聲冷吹  
散遙天碧玉簫

瞳矇寶鏡照長江十丈紅光射綠艤昨夜蘆花飛片片故  
將玉雪打篷窗

寄伯兄羽扇旋報七古一章依韻奉答

高哉碧梧棲鳳毛嚙嚙振翩陵丹霄鬱乎蒼松盤鶴頂翩

展翅依雲巢君子於止知所止堅吾寄託疇能搖豐肌  
美羽胡爲者鐘鼎何如安藜蒿君昔仁風徧澤國舉手扇  
陽陽不驕今年六月又苦熱金飈送入始清蕭我慚一扇  
寄千里聊爲兩地除炎歊君非熱中我冷宦古人何必矜  
題橋胸襟磊落筆鋒利趨炎附熱非英豪湖山別去今七  
載熙州焉能比雪茗數椽官舍地低溼往往久雨生寒潮  
千峯萬嶺羅戶右繞牆芬馥多蘭椒黎祁一味頗不厭開  
軒掃榻能相邀司空佛圖山名助吟詠山川刻露飛彩毫春  
花秋月期不至徒令詩筆走清超相思團扇對明月遙知  
月下寬征袍風生一握涼侵臂秋果再熱奚辭勞君身松  
柏是後彫況有雛鳳誇翔翔天倫樂敘欣所遭一枝笑我  
同鷓鴣君詩摺疊等瓊瑤盥薇讀罷香暗飄

示兒子濬師

吾父生我時四十頭未白今我又四旬父已歸窀穸方幸  
兩慈親侍奉永朝夕胡爲十年中雙親痛疾革哀哉父母  
恩欲報形骸隔廿載困名途歲月皆虛擲雖然作冷官難  
免素餐責有書豈不讀吾父留手跡有杯豈不舉吾母留  
口澤顯揚縱未能光陰須愛惜汝年已十三留心在經籍  
立志貴精勤求師重誘掖少壯能幾何珍重駒過隙莫學  
我無聞老大悲何益

浦口

屈指金陵路馳驅二十秋山光看不足暑氣未全收旅夢  
驚黃葉虛名誤白頭乘風挂帆去卧聽大江流

菊江雜詠

不識誰家柳居然植五株綠陰扶古岸白日澹平湖垣破  
餘荒菜牆頽插短蘆可憐憑眺處山色半模糊

地僻居民少城荒樹木繁浴波翻水鳥歸市剩河豚亦有人  
呼渡曾無吏候門清風吹滿座獨自倒芳尊

登太白樓有感

一別高樓又七年登臨恰值暮秋天分無佳句誇名士誰  
肯憐才到謫仙山雜亂雲歸塔頂江留殘照落帆前金陵  
十度真堪笑贏得千絲雪滿顚

邵詠字子言號芝房電白人優貢官韶州訓導有芝房  
詩存

淮上舟夜

淮南雨晴夜初夏似新秋月色兼涼起河聲入夢流艱難

依蹇僕飄泊信孤舟應識回家日驚心念舊游

沈世良字伯眉番禺人諸生官韶州訓導有小祇陀盦

詩鈔

詩話伯眉少而善病連值兵燹奔避勞窘兵事稍解銓除韶州訓導未上官遽卒詩續密以栗陳蘭甫譚玉生皆甚稱之

蕭閑堂讀書用樊榭城西讀書雜興韻寄示立齋三

弟

解嘲誰計腹便便自愛巾瓶結淨緣入世無心同叔寶故人耽讀有盈川謂青泉燭奴寂寂東西屋月子灣灣上下弦

憔悴天涯烏帽客晚蘆寒荻北來船

極天鴻雁愴離羣第五名曾汐社聞狂客長瑜原善諱酒人孫楚早能軍對牀舊約愁聽雨異地思親獨望雲難得

讀書行萬里故山猿鶴莫移文

蕭閑堂坐雨口號

隱隱雷車走阿香遙天一半尙斜陽  
茶聲滿樹拋書坐矮竹扶雲過短牆

再疊前韻和青皋并呈蘭甫丈

祕冊傳鈔到上清下簾蕭散愛君平  
松陰格破苔低補井

檻泥窪菌寄生香界談經山芋火

病中喜讀西方書

雨鐙搖夢水

洪聲

青皋有水壯年一樣供虛擲卻羨攤書萬里行

歸都下

蘭丈新自

戲贈青皋

嗟君塵甑今十年齋時卓午無爨煙  
撐腸空飽蒼頡字餉客絕少王宏錢瘦羊博士更可憐  
持籌握算心悄然萬金

顛倒擲虛牝三載縛束耕石田飄茵墮溷偶相值如風憐  
目夔憐竄文園賣賦苦不數僧牛牆東亦不惡關中自鬻  
王猛畚市上去賣韓康藥古人遊戲何事無今我胡爲獨  
不樂君本神仙許玉斧我亦清狂沈昭略蟠桃未熟三千  
秋汗漫且作人間游債臺便足供作達娛老豈復營糟邱  
寒山拾得兩窮士來牛去馬千王侯今日斷腸草昨日芙  
蓉花東陵去種青門瓜畫樓曲柄彈箏琶空堂過眼棲飢  
鴉掉頭萬事俱搏沙區區窮達勿芥蒂變滅任化風中霞  
聶節亭字子嘉江西清江人貢生官靖安訓導有松巢

吟橐

贈見山寺廉真上人

青山長對習跏趺晝掩禪關一事無衲毳捲雲懸破榻藥

苗添火煉寒鑪苔深石罅穿浮蟻水閣亭陰睡野鳬時倚  
欄杆吹竹笛數聲楊柳落南湖

擬陶淵明詠貧士

寶劍沈獄底龍光豈自呈良玉蘊深山不知光輝生蕭蕭  
被褐士悵鬱多古情貌枯中自腴銜飾恥希榮知己惜不  
遇澹泊守其貞欲取鳴琴彈明月上前楹

簡周宇安

袁江臘月夜飛雪萬頃玻璃散冰纈杈枒凍木繞江森孤  
洲慘慘寒雲裂柴扉江岸舊爲家畫裏芭蕉映淺沙釣竿  
久共羊裘老月明浦溲舟時拏形骸放浪無羈束忘機跡  
已輕鷗熟不須句漏乞丹砂管領溪山一生足太華山頂  
蓮花開人間富貴輕塵埃一樽許我醉醺醺高興直欲凌



蓬萊

林鶚字太沖泰順人貢生官蘭谿訓導有望山草堂詩

鈔

仿孫觀察詩和荳生見寄

記得去年無射月河橋分手上扁舟我吟錦瑟故多病君  
抱瑤琴且莫愁漸近自然沙落雁於無相與海浮鷗可能  
暫作羅昭諫也向谿山訪舊游

林用霖字亨父泰順人諸生官霞浦典史有望山堂詩  
續

福州城樓晚眺感作

獨立攬晴空南疆此最雄波濤煙樹外城郭夕陽中碧海  
渺何極白雲望不窮八州收鼓角閒數寺樓鐘

由京口溯流達金陵舟中作

一帆高挂鎮江頭路上金陵趁早秋元氣盪潮通碣石長  
風分浪入瓜洲茫茫北顧雲山遠浩浩東流日夜浮積潦  
未消頻欲雨楚天哀雁不勝愁

汪錫珪字秉齋長洲人貢生官江陰訓導分部郎中有  
翡翠巢詩鈔

題潘順之落花圖

蝶怨鶯愁最惱人曲中金縷可憐春恨予已被桃源誤莫  
共漁郎更問津

欲翦巫山一段雲幻空玉女散紛紛隨風吹到波心去紅  
暈魚鱗綠縐紋

不斷晴波漾綠萍陌頭柳眼爲誰青從今妄作封侯想學

得長生種樹經

錢辰字秋潭號龠翁吳縣籍金匱人諸生候選訓導有  
龠翁詩鈔

冷泉亭

不染塵外喧悟徹寰中靜湛若供目娛悠然極心領含風  
澄翠微瀉日澹波影活潑有靈源幽迴絕凡境小坐虛亭  
間欲汲憑修綆安得枕此流夢與泉俱冷

秋日感詠

涼風幾度吹庭草猶含綠秋色滿階除閒觀無拘束披襟  
坐堂坳攜琴彈一曲自寫性中情恬澹何所欲人世如寄  
生寸心重金玉境遇雖變遷由來在知足采菊持兩螯沈  
醉忘榮辱

待旦歌

愁雲密布陰風吹一鐙如豆花亂垂詎聞蟲聲鳴暗壁但  
聽鬼哭哀且悲寒衾敲枕弗成寐披衣起坐彈雙淚星月  
煌煌助日光櫬槍入斗何時墜更有熒惑芒常明焚燹燭  
天心屢驚可惜繁華盡焦土死別生離魂夢輕城開不夜  
仙境縹緲揮戈回日魯陽杳喔喔狺狺時寂靜未央未艾夜  
難曉初更二更倏忽過三更已倦來睡魔酒力欲醒眼尙  
醉搔首踟躕喚柰何書生束手困無策唾壺擊缺劍空擲  
雄雞拍拍斷續嘯竟夕引領東方白

萬同倫字仲桓浙江山陰人官兩淮運判有補蹉跎齋  
詩存

清水橋

澗柳帶殘雨鳥聲說晚晴絮輕隨馬度村近有雞鳴兩岸  
夕陽淡一谿春漲平山程慰遙役蒼翠數峯橫

潼關城樓

崔嵬天設險城闕莽風塵關勢連函谷河聲走孟津有能  
望氣者留意棄繻人日暮危樓上悠悠作客身

旅夜

旅夜百憂煎病骨坐看塵掩匣中刀殘鐙耿耿客無賴落  
月茫茫雞亂號隔歲河流決瓠子幾時戰伐息臨洮淮陽  
一卧驚春至種種羞將短髮搔

張仁渠字步堂蕭縣人諸生議敘鹽提舉有敬思軒詩  
集

呂梁舟中

山色入新秋斜陽送客舟人聲爭渡口帆影落城頭古詩  
紅牆隱清波白鳥浮深宵蓬背看依舊月如鉤

張謙字吉甫蕭縣人諸生山東候補鹽大使有秋窗蛩  
語

扶溝道中

破曉出扶溝遙天霧未收水痕侵客鬢寒色上征裘事業  
渾雞肋功名愧虎頭早知行役苦悔不卧林邱

方玉潤字友石晚號黝石寶甯人官隴州州同有鴻濛  
室詩鈔

登五華山望昆明池

偶覘井宿到昆華金碧光中望眼賒西去濤聲奔迅馬北  
來山勢走長蛇連雲臺殿悲梁土落日旌旗想漢家客裏

登臨多感慨武侯祠樹亂棲鴉

全州節

爲知州曹某都司伍昌顯作

全州節誰最烈都司頭刺史血刺史守城苦無兵都司帶  
兵愁遠別同是天家戮力臣相逢何必判優劣人肉食盡  
鼠雀空弓靴煮爛思殺妾拊膺一慟外援斷無人不憾湘  
灘月丈夫死耳庸何傷能爲厲鬼真人傑君不見睢陽城  
內殺聲哀鄰境笙歌尙清越

冠縣令

爲知縣傅士珍作

冠縣令一家血染粵賊刃咸豐甲寅三月朔賊旗蜂擁來  
何迅一礮已毀二黃纛忽復小旗揮四陣四陣四門亂雲  
集常山蛇難首尾應回身巷戰賊盈衢隻手猶能戮梟獍  
力盡成禽那肯屈張巡原抱男兒性旁有一僕親矚目先

砍公頭後公腹後堂烈婦並烈女五人同時遭殘酷猶幸  
嬰兒屬乳母天留一脈繼良族吁嗟乎智者婢義者僕烈  
者婦忠者牧滇南節義冠青牘

題伯牙臺

江風吹斷楚山青一曲泠泠思欲沈自古解人偏薄命從  
來絕調少知音秋高雁落平沙遠夜靜龍吟大澤深誰信  
靈弦多變徵荒臺戎馬最關心

徐鴻謨字若洲仁和人諸生官揚州府經歷有蒼荀花

館詩集

阮敬齋

克

慎齋

先

雲莊

充

招飲桑榆別業

沙隄曲曲柳陰涼中有裴公綠野堂

桑榆別業

阮文達公歸田所築在甘泉山

東三十里

公道橋鎮恰好聲名傳第五

雲莊文達介弟

新詩驢背滿奚囊



波影山光共一樓西冷臺榭亦清幽

兩奇晴好之樓先相國文穆公手題在西

湖聖因寺旁

披圖我有飄零感

席間出萬柳堂圖屬題

孤負青山事客游

顧遜之字子巽江甯人貢生候選訓導有燕貽堂集

### 西風

洞庭江上始生波嫋嫋西風怨薜蘿商信漸催華髮變涼  
颼偏覺異鄉多梧桐葉寫懷人句薺栗聲傳出塞歌莫怪  
才人悲宋玉愁中時序易消磨

韓崇字元芝號履卿元和人官山東雒口批驗所大使  
有寶鐵齋詩錄

### 窮士

窮士易爲恩寸苗易爲澤豈謂盆盎微種松貶高節皎皎  
雲際月磊磊巖下石懷璞弗自衒流輝乃同澈不易展氏

介已甚世柳迫識曲誠有人雅歌奏清瑟

過弇山尙書廢園

月沼有波曾照影風亭無主倩誰扶  
牆東瘦石如人立閱盡興衰一語無

經訓堂成書萬卷靈巖館闢樹千章  
功名炙手才華盛付與游人話夕陽

錢壽昌初名械字樸之上元人候選縣丞殉難有淮南  
贖草

無題

爐煙裊裊透窗紗鬪草人歸日未斜  
梁燕雙飛鶯對舞東風閒煞碧桃花

重九登第一山

數步到山寺滿園寒菜肥溪泉經雨活檐鳥傍人飛紅樹  
葉初下白雲僧獨歸幽花隔年別相見尙依依

鄭襄字贊侯江夏人官太湖知縣有久芬室詩集

城東春望

散步無遠近幽懷相與清輕陰澹高柳野水拓孤城雨過  
菜花爛風迴溪鳥鳴林居吾最羨安得老桑耕

蒙陰山店與鄧思仲夜話

四月南薰馬首東鞭絲同挂夕陽紅夢回十載塵沙裏人  
老四山風雨中畸士琴尊餘濩落荒村婦子入饑窮與君  
珍重臨前路勞雁遄飛何處蹤

晚晴移詩匯卷一百五十一終

晚晴移詩匯卷一百五十二目錄

崔宜枚

二首

華長卿

三首

蘊秀

二首

清瑞

一首

張岳駿

三首

丁玉藻

五首

宗晉

一首

王茂森

一首

姚前樞

三首

姚前機

二首

張爾旦

三首

王慶楨

二首

王壽康

二首

陸初望

四首

陸懋修

二首

楊後

二首

蔣繼伯

二首

張家鼐

一首

周衡

二首

史一經

二首

劉因之

二首

言娛卿

四首

倪偉人

六首

傅平治

三首

孫麟

三首

孫人鳳

一首

高塏

一首

吳昌榮

二首

黃金臺

一首

陳範

一首

陳乙

二首

鄔鶴徵

一首

王宗耀

二首

鍾樑

一首

曹士鉉

四首

黃源屋

一首

趙福雲

五首

鮑成宗

一首

酈滋德

一首

樊東陽

一首

黃葆謙

一首

方鏞

一首

程蓮

一首

傅燮鼎

二首

潘茂

一首

汪以鉉

一首

黎光地 一首

周燮祥 二首

郭祖翼 二首

楊明上 二首

張煊 二首

程開鎮 一首

楊雲松 一首

丁傳煜 一首

馬敬之 一首

李星漁 一首

譚煥南 一首

黃誠 一首

李偉生 一首

李德揚 一首

潘定桂 一首

馮熾宗 一首

改琦 二首

晚晴移詩匯卷一百五十二

徐世昌

崔宜枚字詠齋霸州人諸生有小隱詩鈔

野望

淡月明空林寒雲隱危堞墟落寂無人蕭蕭下黃葉

蘇橋

紅樓一簇柳千條隔岸誰家紫玉簫好是曉風殘月裏送人帆影過蘇橋

華長卿字枚宗號梅莊天津人諸生有梅莊詩鈔

張家灣題壁

木落西風起行人發浩歌河從蒲口淺樹到蔡村多寺古留殘碣池荒剩敗荷張灣城北路雨後未曾過

九月初五日同沈虛谷昆仲游泮筆泉用壁上木蘭

山人元韻

清泉瀾瀾出方池與客登臨拜古祠一徑松陰秋雨後半  
城柳色夕陽時從來我輩多耽酒到此何人不詠詩獨抱  
幽懷誰見賞問天惟有謫仙知

隋山光寺

隋代山光寺開皇第幾年沿隄千畝竹隔岸萬家煙螢苑  
悲荒草雷塘賸墓田老僧今在否汲井問甘泉

蘊秀字檢之滿洲旗人有靜一齋詩存

聽蟬

小亭斜坐近花欄碧樹清陰宿雨乾聽罷蟬聲風曳去綠  
波深處夕陽殘



夜行

萬壑寂然山月墮  
半天星斗夜蒼蒼  
嶺雲不放鐘聲度  
惟有松花一路香

情瑞字霽山蒙古旗人諸生有江上草堂詩集

天下第一江山歌

君不見長江之水岷源來奔流到此不復回  
又不見鍾山發脈三百里直到金河截然止  
其中突起地肺山第八洞天雲霧裏  
我曾舉手攀雲松松間雲擁三茅峯  
有時雲化一江水片帆如在明鏡中  
如此江山真第一品題論定吳琚筆  
西津無水不來潮東向海門觀日出  
六朝山影樽前收一派江聲筆底流  
左金右焦闢雙闕髣髴玉帛朝  
諸侯旣障狂瀾還對峙卓然竟作中流砥  
須臾霞彩映江飛青

天倒轉作江底豪情高唱大江東掀髯一笑來清風風流  
絕代蘇玉局天下古今無此翁天闢名區住名士稱此江  
山樂無比更有中泠第一泉閒來試向松風煎對此江山  
選名勝幾人搔首問青天少陵無人謫仙死天縱狂歌誰  
繼起起看江月照江清淘盡英雄是此聲古今不少眞才  
子有如一去長江水

張岳駿字端甫無錫人貢生有張端甫遺藁

詩話端甫與侯子勤同爲梅伯言弟子工詩古文  
辭深鬱有奇氣詩嗜山谷然不苟作故存者絕少

八達嶺

莽莽塞雲橫荒山匹馬行石林騰虎氣霜日慘雕聲野果  
亂紅落陰蘿疏翠生當年征戰地辛苦渡河兵

簡陳懿叔

踵箕隘巷擊轂行巷南巷北居兩生一生覓句一校經天  
寒同聽輾冰聲朝來暝日醉虛白繭足駮瘵行不得並門  
十日疏過從恍若千山萬山隔

祀竈夜宣南寓齋卽事

爆竹一城沸鐙花獨夜寒客愁催臘鼓鄉味入春盤積雪  
窗光皎堅冰屐響乾頗聞烽火息不惜酒杯寬

丁玉藻字采之無錫人有西神山人詩鈔

詩話采之以廉吏之子弱冠工詩擢香少陵而兼綜  
眾體尤好王朱二家筆力與李繡子相近每有所作  
冥搜累日小有未安不憚數改同時曾賓谷郭頻伽  
張南山盛稱道之陳蘭甫論詩絕句云循吏而今有  
子孫江天吟嘯布衣尊西神一集才  
如海肯讓更生與悔存謂采之也

寄暢園步月

夜出漪瀾堂微風散林樾簾開螢影度屐響蛩語歇遙愛

水荳花情芬媚涼月

鄱陽早發

榜人鳴銅鉦素舸侵曉發江月皎猶在村雞號未歇蕭然此時意軒蓋定何物卻憶芝山巔匡廬坐超忽董生昔高蹈於此采薇蕨緊我行役久故鄉渺難越終當返西神陽阿夕晞髮

宿天堂墟寄徐鐵孫

榮

陳仲卿

曇

尙秋湄

維鑒

鄒雲

客

文鷺

徐子遠

懶

蕭欒軒

思諫

陳子彝

曾修

梁松

甫

春齡

驚飈捲孤蓬悽愴游子顏夜深荒山道星斗方闌干男兒事行役豈復畏險艱野宿近熊館四顧無人煙時聞潛狙行颯颯林莽間茅茨一罇酒敵此衣裳單疲茶不遑息朝

曦上簷端游魚思故淵飛鳥思故山風波一失所惆悵何時還念我同袍人塌然摧肺肝

觀兵

捷書傳楚塞使相議征蠻伏莽熊皮甲簪花鹿角囊炎風生萬竈殺氣動三關莫學滄涯水東流更不還

送嵇茂門辭之東莞

禺山秋色遠送爾去何之落日雙忠廟寒花九姓祠家貧爲客久身賤得名遲余亦同茲難紅亭酒莫辭

宗晉字麗生常熟人諸生有揖山樓詩

虞山秋眺

浩歌登虞山雨意恰初醒縱目翠微巔浮雲四圍盡風高海有聲日澹湖無影并作乾坤秋濛濛接西嶺

王茂森字雲浦號梅隱常熟人有梅隱吟草

詩話梅隱幼孤貧無所藉供役虞山書院司灑掃啟閑好吟詠一時士夫咸樂就之

自詠

一枝禿筆半牀書幾樹梅花伴竹廬養性未應親市井託  
身何必遠樵漁閒看丹嶂塵心淨久讀黃庭世念疏又是  
一番新雨過藥苗階下帶煙鋤

姚前樞字古然金山人諸生有紅林禽館詩錄

石梁觀瀑歌

曇華亭上風浪浪曇華亭下波湯湯石梁一綫亘縣邈銅  
殿銅塔遙相望跳波激浪息萬籟飛泉澎湃調笙簧似嫌  
水勢太平直中流故遣山屏當山石搏水水愈怒奔騰偏  
與山低昂何年猛士拔劍刺山裂傾翻萬頃玻璃漿不然

捲起天河倒瀉地明珠碎玉滾滾隨銀潢耳聾目眩魂魄  
悸彷彿神仙鸞鳳參翺翔我欲乘風振袂起拋撇下界驅  
神羊洞天卅六徧歷訪藥鑪丹竈求真方天風吹我衣涼  
瀑濺我裳同游促歸去四顧心徬徨山靈笑我志不決俗  
骨未化徒自狂飄然撒手下大荒棲真何日尋仙鄉

拜經臺

去天尺五高世外得奇境插腳萬山低舉頭片雲靜挺枝  
松盡蚪禿頂楓半癭龍目炯炯光澄澈驗雙井恐有神蛟  
潛變化出俄頃石屋闕磊砢鐙龕潔以整枯僧不知年塵  
緣久徹屏老鶴爲守門露涼時一警天風吹冥冥巖花襲  
裾冷空翠淡欲無夕陽散遙嶺

寄堅香弟都下

燕臺五載惜分飛芳草西堂舊夢違  
便著舊時衣也得古來畫錦幾人歸

姚前機字省干號堅香金山人諸生有井眉居詩錄

歲暮寄從子詒孫

燕穀

衝寒犯雪尙間關聞汝年來鬢亦斑  
骨肉無多癡叔老聰明有限稚兒頑  
蠟銷鐙背垂吟淚酒凸觥心照醉顏  
賸我孤身還是累呵融凍管賦囚山

夜坐感秋和一峯韻

檐雨幰風就枕遲怯涼換簟費指持  
難醒易醉杯中物有尾無頭夢裏詩  
久客每思歸亦好得閒恰與病相宜  
茶溫香燼吟聲細此味孤鐙許共知

張爾旦字眉叔常熟人有種玉堂詩藁



落花

吹開吹落只惻惻恩怨都難問曉風細草自黏殘雨碧斜陽猶照別枝紅傷心茵溷皆前定瞥眼雲泥判此中三月江南春似海斷腸知有幾人同

題蔣伯生丈所藏錢東澗東山唱和圖

丈室香鑊旁翠微維摩天女宛相依吟成花雨繽紛裏應有迦陵作對飛

檀板金樽不遣悲落花風悄鬢絲吹新亭幾點殘山碧看罷滄桑替畫眉

王慶楨原名慶桐字維周號薇洲上海人有養和山館

遺槩

詩話薇洲詩清遠閒放時見超拔吳江張春水謂其警峭之句足以遠接劍南近攀歐北微屬過譽但斷

句多佳要  
不可復耳

消夏雜詠

閒卻凌雲筆一枝藕花香裏且吟詩平生心事無人會說  
與沙鷗鷺儻得知

庭院深深小閣幽飲思亭畔綠陰稠四圍種得千竿竹偶  
有風來便似秋

王壽康字二如上海人有自鳴橐

潮音閣

塔影倒穿水楊枝柔卧隄帆隨雲氣化天欲掛頭棲煙景  
涵峯洲濤聲賽鼓鼙不堪憑弔處墨妙感留題

寺中藏有  
李存我先生

生淡月藏烟  
四字真蹟

題陶雲汀中丞采石登樓圖

信有豪情壓九州。攜樽來上謫仙樓。摩天塔影雲煙護。繞郭江聲日夜流。虹影遙分千里月。蟾光靜抱一湖秋。賓朋較似梁園盛。憑賽神仙聚十洲。

陸初望字文泉陽湖人諸生有懷白軒詩鈔

春雨初霽泛江遣興

孤帆江上夕陽回。一片晴雲覆釣臺。山色濃於初釀酒。詩心淡到半開梅。人無風骨才何用。世有知音念不灰。似此煙波無限好。聞愁排遣且銜杯。

早春登銅官山簡莫劍池

千林紅尙勒萬岫綠纔勻。得句肱三折。探幽膽一身。澗泉猶太古。蕭寺亦陽春。高士名。山住襟懷迴出塵。

怪石歌

鄱陽湖邊停短橈登山山石森岩巒纍纍奇怪相轄轆便  
逢名畫難爲描飢鷹側翅摩九皋怒猊攫爪窺雲坳立者  
如鶴伏者猱澗邊卧者如潛蛟忽如達摩航海濤忽如老  
父穀城遭手擎一卷疑兵韜又似鍾馗披錦袍奇醜不畏  
旁觀嘲就中獨具天仙標翩然鬢髻誰刻雕得無思婦魂  
未銷望夫佇立丰姿嬌我聞古人聯石交皴瘦漏秀聲價  
高似此怪狀羅煙霄古人相石徒皮毛

舟過滕王閣

游子浩然歸故關浮生不及水雲閒長江孤棹飄零酒古  
驛斜陽破碎山夢裏慈親添白髮秋來病婦減朱顏滕王  
閣下思風伯肯借帆風頃刻還

陸懋修字九芝元和人貢生有嶺上白雲集

示袁生上池

開騷

三十二韻

君相重調燮聖賢廣施濟以此免天札斯道豈不貴厄言  
歎日出至理久蒙昧靈素非異書談者乃深怪六經分南  
陽首重在營衛苟先傷寒明雜病自能治河間論溫熱仍  
不外斯義子和示三法不過充其既降而及李朱非各自  
爲例升陽與滋陰兼此義乃備惟其不貫通乃若有軒輊  
謂非南陽知母乃非正議胡爲今之人一一昧所自或作  
蠶叢觀或等瓦缶棄數味合一方數方合一劑所據但病  
名視竟同兒戲我豈敢異人人自與我異奈何一稽古譏  
評輒儕輩尊公獨虛衷於我有同嗜命汝棄俗學執經願  
請誨假館汾湖濱一室喜相對奔走慨頻年丹雘愧久廢  
何敢妄相師相長亦交賴爲檢肘後方共洩枕中祕不憚

理窟搜豁然冀朝晦庶幾軒岐堂窺尋得徑隧聖道若康  
莊馳驅本無礙法守在吾徒詣力願無懈果有益於時亦  
爲盛德事自待苟不卑焉肯薄方技瘡痍賴以平所關豈  
云細一子令知醫吾識尊公意

丁卯初夏薄游梨里南去二里許日鳴闌涇東西兩  
小村有天隨橋架其上卽魯望鬪鴨闌也感而有  
作

汾湖水接襖湖濱復此煙波作隱淪席帽仍爲孤往客鶯  
花莫笑不歸人管甯久坐常穿榻郭泰微行自墊巾便擬  
天隨橋畔住藥闌長傍鴨闌新

楊後原名得春字師山號柳門止元人諸生有柳門遺  
臺

田寶應縣舟行夜抵淮安

午發白田浦夜抵淮陰城川途廣且修榜人銳兼程前以  
百丈牽上有孤帆橫不識所經路惟聞風水聲黯黯殘月  
白淦淦寒雲生人語出煙樾篝火深叢明統如戍樓鼓壯  
哉湖防兵宇內正多事此地能宵行瘡痍會掃蕩四海期  
昇平

萬安亭晚眺

曖曖夕陰起漠漠秋煙霏北風捲地來落葉皆倒飛雞犬  
識其主一一還柴扉水底多綠苔下有寒魚依林鳥倦知  
返高樹巢斜暉萬族欣有託予獨無家歸睠言顧城郭涕  
下霑裳衣

蔣繼伯字曉瀛江都人諸生有曉瀛遺藁

詩話曉瀛叔起兄有朱生錦從之學幼慧死於水  
爲文祭之叔起歎謂惠連古冢之作不是過也

### 茅屋

歎息兵戈擾擾中得居茅屋未奇窮不能種秫從陶令且  
喜移家似葛翁白板扉開桑柘外紅榴花映菜蔬叢干將  
在匣非無具擬向淮南事八公

### 得華甥書

蓬門無事懶巾車日日清齋足野蔬傲俗已甘牛僧飲開  
緇忽見豹奴書雲低淮甸山如墨春入燕臺雪滿渠爲問  
騎驢京國客賞奇東觀近何如

張家鼐字調甫一字梅生江蘇華亭人有曼陀羅館詩  
鈔

登西林寺塔同雪庵兄

家鼎作



西林寺塔干雲霄盤空一氣風蕭蕭握衣納級鼓殘步豁  
然開朗忘塵囂九峯羅列如屏障尺水春申在盆盎阿兄  
指點赤松溪目極雲煙不可狀鐘聲隱隱腳底來七重欄  
楯蓮花臺乃知西方象教力能使俗念須臾與灰市聲鴉鵲  
都寂靜寰闡誰知有真境鈴語頻催歸去來夕陽已下青  
松頂

周衡字次夫上海人有寶德堂詩鈔

二月十五夜舟中望月

春光九十半虛過錦瑟年華送綠波惆悵曲阿城畔月照  
人惟有別離多

搔首

搔首踟躕日無言對暮雲書從江上去春向雨中分蔓草

滋吳苑樓船壯楚軍老成徒遠慮輿論正紛紛  
史一經字研餘溧陽人有洮漁遺詩

審灣阻雨

颯颯風聲雜雨聲旅人枕上最分明寒釭欲灺鐘初動一  
片鄉心夢不成

入藤縣

山豁平原出沙含淺水明遠煙生野店寒日下孤城村果  
收紅柿園蔬刷蔓菁因知遺俗厚向晚有人耕

劉因之號偶峯江甯人有蟻餘偶筆

朱藤

蝶蜂紛午架花氣濃如醺層陰覆四匝唾綠化爲雲鋪席  
飲花下飛英落芳樽舉酒和花食可以醉吟魂

冬夜檢書得舊詩彙選錄之

清夜人無寐寒簷月漸西  
凍凝鐙焰小冷壓柝聲低  
撰栗煨餘火翻書檢舊題  
數篇鈔未了鄰舍已雞鳴

言娛卿奉賢人有有竹居存彙

春江詞

天際桃花水年年向海流  
東風吹客去相送幾登樓  
坐惜江波晚參差碧葉浮  
誰封三百斛遠寄董糟邱

春暮吟

江城玉笛飛春寒芳草夜  
綠天南端韶華彈指逐流  
水滿袖春風吹紫蘭少年  
行樂未應晚鳴箏不惜爲  
君彈樓頭一曲東風喜簾  
幙重重自捲起當門烏桕  
嘶紫駟經過臣里東家子  
十千買醉頽玉山當壚歌  
哭誰知已醉呼明月

凌滄洲海水可煮人間愁  
碧城落花昨已掃彩雲飛下白  
玉樓明鏡朱顏豈長好  
當筵且脫千金裘東風飲汝一杯  
酒莫遣桃花笑不休

北固

金焦鼎峙海雲橫山勢西迴鐵甕城  
六代風煙鎔石壁五  
州鎖鑰枕江聲樓船夜嘯南徐市  
畫角秋嚴北府兵遙望  
佛狸祠下路神鴉社鼓舊連營

江介西風日夜聞城頭落葉草紛紛  
楚天蕭瑟秋無際吳  
渚微茫望不分潮落黿鼉沈海氣  
霜清鷹隼下蠻雲蒼然  
暝色淮東滿獨倚危欄到夕曛

倪偉人字倅侗祁門人諸生有轍耕吟橐

詩話倅侗久困場屋以授徒自給  
幕游大江南北詩爲時流所稱

白門秋望

魏我層堞俯晴溪極目金陵落照西江到石城千派合山  
圍天闕萬峯低嵐煙翠迴餘龍氣玉樹歌殘咽烏嘯莫問  
古都舊時事六朝宮地草萋萋

懷湛二海州

青楓颯颯草斑斑舊雨天涯且未還況是別離千里外更  
無消息十年間秋風迢遞田橫島海色依微孔望山顧我  
相思自憔悴羈人應改去時顏

舟夜

寒月挂危檣驚波下大荒秋風千里雁碁枰萬家霜獨夜  
看長劍疏鐙倚隱囊何人吹玉笛愁思亂江鄉

江東

將才尊向寵先帝數稱能雙節頒新命千軍入秣陵名高  
欺白馬氣激感蒼鷹遙看行營處飛鳥避羽矰

楚北朔屯營江南待用兵承恩先錫號討虜舊知名風勁  
喧金鼓雲寒護玉旌儲胥連九井爲抗石頭城

福州晚眺

別夢伶仃感絮飛行吟閒付野薔薇山迴平楚春陰散水  
抱孤村晚渡稀向浦蛙聲催月上投林鷗影擁雲歸天涯  
故舊長相憶徧倚東風望翠微

傅平治字安如登封人諸生

江行晚眺

滔滔波浪湧隔岸夜猿嘯秋老風偏密江遙路欲迷帆隨  
孤雁小山入遠天低隱隱林叢裏依稀見古隄

早發

微寒秋倍爽宿雨一帆收  
初日破潮出晴江背郭流  
雲遮山外塔人住水邊樓  
指點汀洲路忘機狎白鷗

江上別友人

遠送行舟酒一尊離人秋日最消魂  
目極征帆隨客路心同去雁到家門  
白雲紅葉山邊寺流水夕陽江上村  
花月何年更得聚重將舊事細推論

孫麟字蘇門錢塘人諸生有秋嘯堂詩藁

落梅

誰家一笛怨東風春遠孤山鶴唳空  
殘雪蹇驢人去後小橋流水月明中  
縞衣夢斷沈沈夜粉壁香消九九紅  
曾說當年修不到又看桃李鬪春工

新晴

斜照拂簾影清風度檻微落紅不忍掃春色上羅衣沽酒  
出山市賣花人未歸迴看芳草綠蝴蝶滿園飛

初夏雜詠

不覺紅英盡還看碧薜侵方塘生水氣斜日轉庭陰俯仰  
懷天趣清虛涵道心幾竿新竹長煙雨護深深

孫人鳳字翔伯錢塘人諸生有復見心齋詩草

子澄示西湖雜感諸作答以五律

百物有興廢金牛去渺然人心遺愛在天意劫灰捐荒冢  
多新鬼空山少杜鵑歎顏先我輩春上載書船

高塏字子才號爽泉錢塘人

題韓小米日華揚州畫舫詞圖



公子今詞客清才擬謫仙歌成紅豆曲人對綠楊天豔洗  
芙蓉水香生芍藥田好留佳句在莫讓古人傳

吳昌榮字嘯江嘉興人諸生有登嘯集

讀兩漢書雜詠

沙中偶語坐斜曛雍齒侯封解眾紛卻忘焚身功第一黃  
金未鑄紀將軍

直言悟主表孤忠白首爲郎將略雄每飯何須思鉅鹿忘  
教魏尙老雲中

黃金臺字鶴樓平湖人貢生有木雞書屋詩集

湖上秋泛

湖水淡秋影曉涼移畫橈好山皆繞郭疏柳不藏橋篷底  
一尊酒樓頭何處簫汀洲采芳杜殘夢碧天遙

陳範字道莽蕭山人有對牀樓詩藁

渡江

山月欲落雞始鳴西興球上行人行爭曉沙頭候潮去水  
鄉八月秋風生海水東連浙江渡滅沒寒煙不知處潮平  
擊鼓下中流回看蒼蒼故陵樹

陳乙字振雯號藜閣一號小政平陽人貢生有鳳研齋  
存藁

雨中登浩然樓

飛樓何巍哉突兀峙孤嶼曠望臨中川微雨散洲渚空濛  
鳬稍飛蕭瑟潮愈怒卻眺大江流鯨波一何巨蛟龍盤蹙  
踞日月相吞吐憶昔文丞相英風照巖戶當年起赴義驅  
羊搏猛虎一聲白雁來四鎮議終阻氈車已北行三王在

何許流離寄一舟  
殘軍謀保聚  
滄海盡橫流  
江心作砥柱  
五坡一喪師  
崖山摧風雨  
柴市致命日  
且傳臨終語  
斯人跡已遠  
初地餘祠宇  
荒唄流空山  
花藥覆平圃  
風物隨變遷  
正氣留終古  
拂衣重徘徊  
經堂罷齋鼓

雨後

空山微雨後  
孤閣夕陽沈  
新月出雲際  
清風生竹林  
蕭蕭涼意足  
寂寂小窗深  
習氣難除卻  
難禁伴獨吟

郭鶴徵字雪舫浙江山陰人  
諸生有吟秋樓詩鈔

送蓮舫先生謫戍伊犁

絕塞崎嶇道路難  
九邊風色萬重山  
好從博望探河曲  
終見班超入漢關  
大漠驚沙盤馬足  
高天明月指刀環  
策勳自効他年事  
莫遣霜華點鬢斑

王宗耀字恂德號荀石鄞縣人諸生有願學堂詩鈔

漫興用東坡東武與人往反粲字韻

我生如行路百里可居半佳境思漸入往往得驚歎此後  
將安歸甯復堪把玩過者盡陳因來者方聚散豈無三數  
人尙與我同伴同伴問何爲寂寂守昏旦行或事鋤耔靜  
不離几案有時相晤語祇覺方寸亂人情可欣悅要如薦  
方盥絃弛不欲聞多病音節緩更張豈無術好歌續珠貫  
遇雲響未成折楊興又懦復然望寒灰寸燄依屑炭歡顏  
底廣廈勞心屬旅館偶逢扇喝涼非私負曝暎豈如東人  
子但誇衣粲粲

和東坡虞姬墓

如此鴻溝負約何美人留得楚山河讀書名姓真麤記一

喚虞兮便不磨

鍾樑字山橋秀水人諸生

秦駐山歌

留侯椎折秦副車惜哉此行不擊計議疏博浪車行疾如  
駛那比斯山巖嶮嶺屹皇駐輿意不樂海山仙人排  
雲落鞭石驅海戴六鼇蛟龍潛窟不敢攪我聞茲游事在  
三十有六年鮑魚遺臭踵不旋胡爲運終夢戰爭海神震  
懾巨魚驚又聞阿房起宮殿東南財賦搜括徧斯山斬伐  
詎有遺木魅睽睽血疑從輦前濺嗚呼祖龍計亦拙咸  
陽此來成永訣重瞳之炬大海愁急湍拍岸聲聲含嗚咽  
君不見山之絕頂鷹爲窠鷹瞵閃爍如催梭電光一瞥千  
里外雙眸炯炯爲皇東向訶豐沛

曹士鉉字恩復號芝泉又號藥君嘉善人諸生有湘蘭錄

宿峽口題壁

峻絕仙霞嶺雄關踞上游萬竿新竹解一路野泉流古殿  
招雲住斜陽隔樹浮深山涼雨後五月木棉裘

明日阻雨不發再留一首

欲與山靈別山靈不放回溼雲吹作雨澗水吼如雷捫壁  
尋詩句開襟倒酒杯浮屠桑下宿臨去重徘徊

書所見

了頭小女十三餘楚楚風姿畫不如山似黛痕波似鏡把  
竿閒釣子陵魚

寄九弟菊辰

畫箇清宵立月圓思家我與少陵俱可將詩句先題好寄  
到榕城寫入無

黃源屋字左泉號克齋餘姚人有鶴枝軒牋橐

讀杜工部集偶成

浣花書舍一儒生太白齊驅海內驚稷契自期匡北闕唐  
虞難再痛東京雄心射斗濺千古健筆如刀破百城天矯  
屈盤同檜柏千年化作老龍精

趙福雲字耦村浙江山陰人有三惜齋詩集

夜歸

疏雨歇殘響涼月澄清輝步履出蘿徑微寒生客衣沙隄  
一痕白積水搖參差野花送微馨夜靜方得知幽居隔塵  
境興盡還柴扉秋聲打門急落葉隨人歸

揚州

紅橋二十四空憶杜司勳明月長如此簫聲不可聞江船  
懸夜火隄樹卧春雲一棹平山外楊花似雪紛

入終南山

飛鳥不能渡盤空一騎來峯頭撐積雪石腹走驚雷呼吸  
諸天應功名捷徑開終南山萬仞擲筆待仙才

仙姑礪

畫眉曉春山木香懶雲窈窕扶紅牆妝樓一角夕陽冷寶  
鏡搖魂墮蟾影雙蛾掃綠參差光苔痕繡蝕輕羅裳銀波  
溼地花枝舞珠淚橫斜纖秋雨刺天石骨青嶙峋螺旋蟻  
折愁行人芙蓉劈碎斷厓裂倒捲銀河千尺雪靈風颯颯  
迴蜺旌夜半月落金雞鳴



咸陽題壁

柳絲青溼雨纖纖  
貰酒旗亭駐客驂  
欲唱渭城哀怨曲  
舊人無處覓何哉

鮑成宗字維城一字雲石瑞安人諸生有摘星樓詩存  
自蓮花洞至白雲寺

兩崖如伏獅鳥道通一縷  
侵晨理輕策過此日停午小洞  
纏枯藤十步忽一俯以手捫膝  
行徑逼寒慄股出谷見晴巒  
奇勝紛堪數白雲不可留  
片石自太古須臾老僧歸邀  
我愜所取飛瀑走澄潭咫尺  
蓄雷雨對此羣動空猿鳥足  
賓主薄暮探杖還秋煙渺遠浦

酈滋德字昌言號黃芝諸暨人有半情居集

雙龍漱歌

仙人身披芙蓉裘笑騎白鶴聞山頭手中綠玉九節杖下  
窺瀑布雙龍湫東湫老龍寒方蟄殷雷勃勃起虛室珠簾  
千尺挂秋風倒捲寒光瀉斜日西湫亦是龍所宮一潭皎  
潔正當中冷猿抱月嘯青雨噴雲吐霧連鴻濛匹練古今  
長不改神物護持煩真宰蓬萊三度早揚塵眼中還見雙  
湫在天孫簫鼓彩霞開明璫玉女春徘徊回頭大笑人間  
世短歌一曲歸去來

樊東陽一名貞凝字碧渠黃岡人諸生有碧渠集

出游

振衣上孤艇偏與塵世隔游山先泛水水上山歷歷人影  
水滌盡始合山雲色石島裂古紋竹潭搖深碧流轉帆正  
順山迴舫又逆水如作文字有曲方能直不知幾滌洞便

到潯陽驛

黃葆謙字子嘉武昌人有讀未見書齋詩鈔

對月

明月出東嶺萬籟倏已靜庭樹含清陰微風弄花影羅衣  
生夜涼仰視星漢迴美人渺煙水蘭室黃生菌瑤琴恥獨  
彈知音空引領悠悠積寸心一夢江雲冷

方鏞字笙甫黃岡人優貢有笙甫詩鈔

旅館不寐

涼風起日暮木葉莽蕭蕭高館一燈悄故鄉千里遙蟲聲  
寒古壁蜨夢醒殘宵明月不知處離愁空酒澆

程蓮字友青號魚溪嘉魚人諸生有借止廬詩存

飲朱秉庵宅送少白歸華容

歸舟重過我杯酒復觴君白雨昏天末紅爐暝夜分來從  
茅口路去卧洞庭雲別後還相憶翹望到日曛

傅燮鼎字鐵椽崇陽人有我泉集崇質堂詩稟雪浪餘  
音

溪上懷人

清溪日夜流客去幾時返溪前萬疊山相對柴門晚棲鴉  
拂岸低翔鷺依天遠浩歌無人和悵然念嵇阮

山村

蒙密松陰日未斜旋聞犬吠得人家西風滿路墮如雪無  
數山村茶子花

潘茂字志華江夏人

北固秋望

秋色千家帶郭昏英雄已矣霸圖存赭衣舊厭秦皇氣黃  
鶴空招宋玉魂夜冷一鐙懸佛閣月明雙旆閃軍門年來  
海國樓船靜尙有如山鐵騎屯

汪以鉉字仲閔江夏人諸生有鏡秋閣詩藁

讀孫芝房漆室吟

華嶽衝天起黃河倒海來文章如此壯家國亦同哀寒燭  
滄江夜春花洛下杯吾儕何所慮已有中興才

黎光地字環齋益陽人監生有雲廬山房初藁今吾集

溪上

輕衫短策趁春閒草長平蕪綠滿灣恰有橋通煙外店更  
無雲掩雨餘山誰家新燕同人語一任流鶯笑我頑如此  
風光渾領得不妨著向畫圖間

周燮祥字叔和一字調臣湘陰人諸生有玉池山樵詩

鈔

歸路

故人慘相別歸路幾盤旋斜月夜將半疏鐘僧未眠猿嘯  
沈野色犬吠入溪煙林壑自朝暮此心殊悵然

紅葉

楓相千行夾道周滿林紅葉映江樓梅花未發黃花謝賴  
爾彌縫一段秋

郭祖翼字芭泉善化人諸生有雨福山房謄草

風雲亭同周芙汀夜坐次芙汀韻

曲徑穿林滑孤亭得地偏池光團作露山氣動如煙疏簾  
俱涼月枯琴韻澗泉清歡能幾輩莫惜醉銀船

九日登玉皇山

猿鶴何勞漫見猜，偶隨同隊踏崔嵬。  
路從落葉堆中辨，人自羣山缺處來。  
石筍屢妨游屐折，菊花多傍客筵開。  
題糕無句酬佳節，權向西風醉一回。

楊明土初名林翰，字旭初，號漁皋甯遠人。  
諸生有辨儒堂詩集。

立秋日自瀉泥濘至雞鳴坳亭子

甕底青天動，連山入甕青。  
天光開一角，山翠壓孤亭。  
涼鬢驚秋到，枯蓬感涕零。  
行人歌互答，愁絕不堪聽。

四泉山小憩

暫得偷閒坐，心境亦清。  
窗銜孤塔影，門掩大江聲。  
明月懷前世，梅花記後生。  
眾僧如舊識，相對不勝情。

張煊號小蓴沅江人有巢睫吟藁

憶夢

遽然一夢洞庭西水滿沙平雲腳低塔影湖光舟自渡春風十里綠楊隄

聞雁

千里雲山信到稀嫩寒和雨浸春衣潯陽戎馬無消息又在邊城送雁歸

程開鎮字如崧號靖侯漢川人諸生有小竹園詩鈔

題墨龍

驚風拍岸勢漫漫大地真成墨一團直使乾坤留渾沌故教雷雨供波瀾爲霖天許昂頭近出岫雲都住腳難飛上禹門人不覺依然壁上等閒看



楊雲松字升之一字鶴皋湘潭人諸生有竹舫小草

池南雜興

鑿石通幽澗連筒納沃泉平渠波展鏡夾岸柳飛絲射鵬  
青絲繳沽春白打錢雅游吾未倦乘興過前川

丁傳煜字笠田華容人諸生有春柳堂詩鈔

舟中秋夜望星沙

楚天圓魄朗深秋永夜征帆鏡裏游一帶炊煙雲外樹萬  
家鎧火水邊樓干戈未罷蠻兒戰絃管猶聽越女謳自笑  
頭顱嗟老大衡湘年少盡貂裘

馬敬之字悔初湘潭人諸生有四待軒詩鈔

雪釋

雪釋溪流急煙凝暮色幽鐘聲松際寺鎧影竹間樓踰蹬

身猶昨縱橫願未酬何堪更春景取次赴閒愁

李星漁字季眉湘陰人諸生有觀香室遺藁

輓湖南提督塔將軍

齊布

嗚呼將軍今已矣遺恨茫茫大江水紅巾未滅老母存熱  
血滿腔心不死素輿丹旆潯陽來千人萬人同一哀東南  
半壁更誰倚擎天失此非常才憶昔蟻賊攻潭州觀戰日  
上孤城樓鮑公帳下見顏色早驚英氣橫高秋在楚奇功  
難具述作廟報之薦芬苾忠魂恍惚深夜歸靈雨瀟瀟風  
瑟瑟

譚煥南字靜甫新化人諸生有棣軒詩草

夏晚卽事

萬壑蒼茫天暝時山高月影來樓遲隔鄰幼子讀桃葉薄

醉老翁歌竹枝蝙蝠檐牙避夜雨蜘蛛屋角添晴絲小姑  
呼伴采菱去一派笑聲喧碧池

黃誠字伯光號月崖善化人有晚香書屋遺藁

柳浦道中

故鄉日以遠客路尙漫漫薄暮村春急前谿野燒殘灘聲  
晴似雨水氣夜生寒舟子饒風味春蔬當晚餐

李偉生字鹿門成都人諸生有邃謚軒詩草

送李養田

綠波兼碧草欲別悵悽悽夜雨洗山色春風送馬蹏我情  
同水遠人影入花迷門外餘行跡深深印雪泥

李德揚字芳谷縣竹人諸生有聽花吟館詩藁

春寒

春寒晏起篆煙留一桁湘簾緩上鉤浪簸飛花圍曲沼風  
掀猛雨入層樓傍人悄宿棲檐蝶逐婦紛曉隔竹鳩天欲  
放晴還似客開箱重檢木棉裘

潘定桂字子駿號駿坡番禺人諸生有三十六村草堂  
詩鈔

春夜

殘春天氣似秋涼新筍抽梢綠過牆客去庭空人盡後白  
蟬花上月如霜

馮熾宗字穀孫南海人諸生有淩虛閣詩草

山行

山行不知遠幽尋渺無極四山皆白雲漠漠寒煙積茂林  
無停颺清露忽成滴數里入丹楓千年卧古柏散髮對夕

陰此意誰能識忽聞遠寺鐘一聲度空碧肯負邱壑心我  
生幾兩屐

改琦字伯蘊號香白又號七薌江蘇華亭人有吳越紀  
游詩

詩話七薌先世出西域其大父沒於王事移家雲間  
工畫最長士女間作折枝花媚秀如生長於荷聲有  
玉壺詞題畫亦自署玉壺外史

雨中

金陵獨客坐江城況復鳩唳不斷聲夢裏家山今日到春  
來風雨幾時晴湖頭水漲平橋綠溪上雲來貼樹行寂寞  
未酬登覽興與扁舟回首若爲情

湖上晚歸

湖中風景足流連暝色如何促畫船欲借危峯撐住日怕

將柔勝盪開天鳥嘯花落雨初歇水闊春深風更顛回首  
鳳凰山上路斷煙荒草正悽然